

沈氏尊生書卷十

傷寒論綱目

沈金鰲輯

陽明經

循衣摸床

綱仲景曰太陽中風以火發汗邪風被火兩陽相薰其身發黃陽盛則欲衄陰虛則小便難但頭汗出口乾咽爛或不大便久則譫語甚者至噦手足躁擾捻衣摸床小便利者可治傷寒若吐若下後不解不大便五六日上至十餘日日晡所發潮熱不惡寒獨語如見鬼狀若劇者發則不識人循衣摸床恍惚而不安微喘直視脈弦者生澀者死微者但發熱譫語者大承氣湯主之若一服利止後服固許叔微曰有人病傷寒小便不利日晡潮熱手循衣縫兩手撮空直視喘息醫見之皆走此誠惡候得之者十中九死仲景雖有證而無法但云脈弦者生澀者死已經吐下難以下藥漫且救之若大便秘通而脈弦者庶可治與小承氣一服而大便利諸疾漸退脈且微弦半月愈或曰下之而脈弦者生此何意也余曰金匱云循衣妄撮恍惚不安微喘直視脈弦者生澀者死承氣湯主之余嘗觀錢仲陽小兒直訣云尋衣領及捻物者肝熱也此證在金匱列於陽明部蓋陽明者胃也肝有熱淫於胃經故以承氣瀉之

且得弦脈則肝平而胃不受尅。此所謂有生之理。讀仲景論不能博通諸方書以發明隱奧不可也。王好古曰。許學士作循衣撮空是肝熱風淫末疾。此論誠當然。莫若以爲肺熱之邪。其人必妄言亂語。難經云。肺邪入心爲譫語也。趙嗣真曰。此條分三截看。自起句至如見鬼狀一截。是將潮熱譫語不惡寒不大便對爲現證。下又分兩截。以辨微劇之殊。微者但發熱譫語。但字爲義。以發熱譫語之外別無他證。用承氣曰一服利止後服。見其熱輕。猶恐過下也。若劇者起至澀者死。此熱極危證。不可不決其生死。此陽熱已極。若脈弦爲陰未絕。猶可下之以復其陰。脈澀爲陰絕。不必藥矣。王肯堂曰。循衣摸床危惡之候也。有二證。一由太陽中風以火劫汗。因成壞病。捻衣摸床。此則小便利者生。不利者死。一由陽明裏熱之極。循衣摸床。此則脈弦者生。脈澀者死也。按婁全善云。嘗治循衣摸床數人。皆用大補氣虛之劑。惟一人兼調振代。遂於補劑中略加桂二分。亦振止脈和而愈。此亦偏治之法耳。由於偶中。未可奉爲科律也。恐醫者見婁氏之語。遽或效尤。以致殺人。故特識於此。閱者不可忽也。

自汗 盜汗

綱仲景曰。陽明病發熱汗出。此爲熱越。不能發黃也。王肯堂曰。衛氣者。護衛皮膚。肥實腠理。禁固津液。不得妄洩。邪氣干之。若不能衛固於外。由是津液妄洩。澼澼然潤。澼澼然出。不因發散而自汗出也。

傷風則發熱自汗。中暍則汗出惡風而渴。風瀰甚則汗多而濡。言風與暑濕爲邪。皆令自汗。惟寒邪傷榮而不傷衛。是以膚腠閉密。汗不出也。始雖無汗。及傳入裏而爲熱。則榮衛通腠理開。亦令汗自出矣。自汗又有表裏之別。虛實之異。若汗出惡風及微惡寒者。皆表未解。宜發散。至於漏不止而惡風及發汗後而惡寒者。表虛也。宜溫之。此皆邪氣在表。若汗出惡風寒者。此表解裏病。下之則愈。如本條及陽明發熱。汗出急下之條是也。自汗雖常證。或汗出髮潤如油如珠。著身不流。皆不治。必手足俱周遍身悉潤。縻縻然一時汗出熱已身涼。乃爲佳兆。魏荔彤曰。陽明病本應發熱汗出。則太陽傳入之邪發越於外。故胃津內耗。而邪熱在胃漸實。雖能成胃實之正病。却無發黃之變病也。

綱仲景曰。陽明病外證云何。答曰。身熱。汗自出。不惡寒。反惡熱也。問曰。病有得之一日。不發熱而惡寒者何也。答曰。雖得之一日。惡寒將自罷。卽自汗出而惡熱也。問曰。惡寒何故自罷。答曰。陽明居土中也。萬物所歸。無所復傳。始雖惡寒。一日自止。此爲陽明病。傷寒轉屬陽明者。其人漉然微汗出也。汗出身熱不惡寒。便鞭譫語者。宜承氣湯。陽明病發熱。汗多者。急下之。宜大承氣湯。國王肯堂曰。此身熱汗出不惡寒。屬裏爲陽明本證。中風則有汗。傷寒則無汗。惟入陽明乃有汗。故曰陽明病法多汗。若兼便鞭譫語者。下之。魏荔彤曰。首條陽明病是由太陽中風而傳入者。二條是由太陽傷寒而傳入者。

可知傷寒之惡寒爲無汗。而中風之惡寒爲汗自出也。可知陽明之由傷寒傳入初得尙惡寒。陽明之由中風傳入初得尙惡風。迨至汗自出而惡熱則無論風寒皆已傳入陽明無疑也。太陽中風則發熱惡風。汗自出爲正證。太陽傷寒則惡寒無汗爲正證。今傳入陽明則但以汗出惡熱爲正證也。太陽病有惡風惡寒。傳陽明則變爲惡熱。此太陽陽明之大關鍵也。故一日惡寒二日自止。所謂萬物歸土者。祇因表邪變熱由太陽之經絡近陽明在表初變熱必已犯陽明之經矣。及熱入裏有不犯陽明之府乎。再胃主容納物入其中必稍停蓄方下大腸邪熱入亦如是無二理。此所以曰萬物所歸。又曰無所復傳也。無所復傳正言胃成實結耳。若邪入氣足升散自有少陽門戶何謂無傳。惟其實結已成則非推蕩不行。故無所復傳。正欲言傳以求得傳示人而已。太陽中風病具亦名傷寒。其人原當自汗出而病亦未解。忽自汗出者漸覺濇然汗出而微。是太陽中風以汗出而微爲轉屬陽明成胃實之候也。陽明病胃熱已盛結而成實。乃正陽陽明之正證。急當攻下之。蓋以陽明爲病而發熱汗出者初病也。胃成實否尙未可定。迨發熱久而汗出多則津液內耗邪熱大熾。必腸乾屎鞭而成實矣。此不急攻眞爲無所復傳之證矣。故必急用大承氣。此爲汗之自出津亡者言也。

綱仲景曰陽明脈浮而緊咽燥口苦腹滿而喘發熱汗出不惡寒反惡熱身重若發汗則心憤憤反譫語。

若加燒鍼。必怵惕。煩躁不得眠。若下之。則胃中空虛。客氣動。膈心中懊憹。舌上胎者。梔子豉湯主之。若渴欲飲水。口乾舌燥者。白虎人參湯主之。若脈浮發熱。渴欲飲水。小便不利者。豬苓湯主之。目成無已曰。脈浮發熱。口苦者。邪在表。脈緊自汗。腹滿不惡寒者。邪在裏。此表裏俱有。邪宜和解。王肯堂曰。自汗而兼脈浮。緊口苦者。忌汗下。鍼宜和解。魏荔彤曰。梔豉湯。是仍以太陽治表洩熱之法。治陽明可見。非拘拘專治陽明者可愈。陽明病也。白虎人參湯生津滌熱。熱去津回。而汗出。治陽明。卽所以治太陽。陽明也。豬苓湯導水清熱。滋乾未嘗及太陽之表。而太陽之府邪去。氣宣其表。亦不待再治。是又治太陽之府。卽所以治太陽之表。而治太陽之表。正所以治太陽。陽明又可見。非拘拘專治陽明可愈。陽明病也。

綱目仲景曰。陽明病。欲食。小便反不利。大便自調。其人骨節疼。翕翕如有熱狀。奄然發狂。漑然汗出。而解。此水不勝穀氣。與汗共并。脈緊則愈。陽明病。若中寒。不能食。小便不利。手足漑然。汗出。此欲作瘡瘕。必大便初鞭後溏。以胃中冷水穀不別故也。王肯堂曰。此自汗而兼小便不利者。當分欲食不欲食。欲食者。宜桂枝湯羌活湯。不欲食者。宜吳茱萸湯理中湯。魏荔彤曰。此原本中風而病。兼水濕者。陽明病欲食。此由中風而成。然陽明宜大便難。今小便反不利。大便反調。又骨節疼。如有熱狀。而非大熱。則皆

風兼濕爲患也。夫欲食仍兼風象。小便不利則濕盛。大便自調則熱輕。骨節疼爲濕多。熱狀爲熱少。此洵風濕與熱雜合而成之陽明。俱不可作胃熱論治者也。迨至風邪所變之熱入裏而發。透表而汗出。陽明病亦遂解矣。蓋胃家熱邪既爲濕間。不能成實。欲食而得食。則胃家之穀氣卽能扶正。不解而自解。故水濕之邪因穀氣得養卽爲退舍。且能併力於汗。俾熱邪透表而愈。水濕其罪之魁而功之首乎。言脈緊者言不若病脈之緩而已。非必如傷寒之緊也。痼瘕者陰氣堅凝閉秘之證也。胃冷而水穀不別則溫中補胃之不遑已。敢云下哉。

綱仲景曰。心下痞。大便鞭。心煩不得眠。而復惡寒汗出者。附子瀉心湯主之。太陽中風。其人漿漿汗出。發作有時。頭痛。心下痞。鞭滿。引脇下痛。乾嘔。短氣。汗出不惡寒者。此表解裏未和也。十棗湯主之。曰王好古曰。太陽自汗。桂枝湯。陽明自汗。白虎湯。少陰自汗。四逆湯。陽明證。身熱目痛鼻乾不得眠。不惡寒而自汗。或惡熱而尺寸俱浮者。白虎湯。王肯堂曰。此自汗而兼心下痞者。當分惡寒不惡寒。綱仲景曰。陽明病。其人多汗。以津液外出。胃中燥。大便必鞭。鞭則譫語。小承氣湯主之。若一服譫語止。更莫後服。陽明病發熱汗多者。急下之。宜大承氣湯。曰朱肱曰。陽明病法多汗。而陽明亦有反無汗之證。不可不察也。柯琴曰。陽明主津液所生病。故陽明病多汗。多汗胃燥之因也。

綱仲景曰服桂枝湯大汗出大煩渴不解脈洪大者白虎加人參湯主之傷寒發熱無汗嘔不能食而反汗出濇濇然者是轉屬陽明也 綱朱肱曰陽明證汗多而渴者不可與五苓散若汗多胃燥豬苓復利其小便也可與苡仁竹葉湯 柯琴曰胃實之病病機在汗出多病情在不能食初因寒邪外束故無汗繼爲胃陽遽反故反汗多

盜汗

綱仲景曰陽明病脈浮而緊者必潮熱發作有時但浮者必盜汗出 綱朱肱曰脈浮盜汗黃耆湯或柴胡薑桂湯桂枝茯苓白朮湯 王履曰盜汗者睡而汗出也睡則胃氣行裏表中陽氣不緻故津液得泄覺則氣行於表而汗止矣 樓英曰雜病盜汗責其陰虛傷寒盜汗由邪氣在半表裏使然也若邪氣在表則又謂之自汗矣經曰微盜汗出反惡寒者表未解也又陽明當作裏實而脈浮者云必盜汗是猶有表邪也非若自汗有表裏虛實之別

綱仲景曰三陽合病脈浮大上關上但欲眠睡合目則汗 綱劉完素曰關脈以候少陽之氣太陽之脈浮陽明之脈大浮大之脈上關上故知三陽合病也膽熱則睡少陰病且欲眠睡目合則汗出以陰不得有汗但欲眠睡目合則汗出知三陽合病膽有熱也小柴胡湯瀉心湯 張元素曰或謂此證俱屬

少陽篇中亦可用小柴胡否。答曰可用。夫三陽合病其邪發見於脈也。浮者太陽大者陽明關上者少陽也。但欲眠睡目合則汗。此膽有熱脈證相符。故出於少陽篇下。蓋脈浮無證不可汗。脈大無證不可下。浮大之脈俱上關。知三陽合病而熱在膽也。膽居在半表裏。用小柴胡亦當。

頭汗額汗
手足汗

綱仲景曰陽明病下血譫語者此爲熱入血室。但頭汗出者刺期門隨其實而瀉之。漚然汗出則愈。目朱肱曰汗出譫語者有燥屎也。過經乃可下也。下之早語言必亂。以表實裏虛故也。病人表實裏虛元府不開則陽氣上出。汗見於頭。凡頭汗出者五內乾枯。胞中空虛。津液少也。慎不可下。下之者謂之重虛。然頭汗出者有數證。傷寒五六日頭汗出微惡寒手足冷心下滿口不欲食大便鞭脈細者此爲陽微結。必有表復有裏也。脈沉亦有裏也。汗出爲陽微。假令純陰結不得復有外證。悉入在裏。此爲半在裏半在外也。脈雖沉緊不得爲少陰病。所以然者陰不得有汗。今頭汗出故知非少陰也。小柴胡湯主之。傷寒五六日已汗下胸脇滿微結小便不利渴而不嘔但頭汗出往來寒熱心煩者此表未解。柴胡桂枝乾薑湯。心下緊滿無大熱汗出者茯苓湯。劉完素曰熱入血室或陽明被火及水結胸皆但頭汗出俱是熱鬱於內而不得越者也。此數者或吐或下皆欲除其熱也。朱震亨曰血室肝也。

肝之熱者必移其熱於心。遂令心氣受傷。既不能主血。亦不能作汗。故但頭有汗而不能遍及於身也。
綱仲景曰。陽明病下之。其外有熱。手足溫。不結胸。心中懊憹。饑不能食。但頭汗者。梔子豉湯主之。**同朱**
肱曰。病人表實裏虛。元府不開。則陽上出而頭有汗也。**張介賓**曰。頭汗之證有二。一爲熱邪上壅。一爲陽氣內脫。蓋頭乃諸陽之會。凡傷寒遍身得汗。謂之熱越。若身無汗。則熱不得越而上。蒸陽分。故但頭汗出也。治熱蒸者可清可散。甚者可下。在去其熱而病自愈。至氣脫一證。則多以妄下傷陰。或尅伐太過。或泄瀉不止。以致陰竭於下。則陽脫於上。小水不通。而止見頭汗。則大危矣。頭汗脈緊數。有表邪當散者。小柴胡湯。或柴胡桂枝乾薑湯。若有火邪脈洪滑。內多煩熱。頭汗當清者。人參白虎湯。益元散。若水結胸。心下滿。頭汗出者。大陷胸湯。小半夏茯苓湯。若便結腹脹疼痛。頭汗者。承氣湯。若諸虛泄瀉。陽脫頭汗者。速用獨參湯。大補元煎急救之。庶可保全。**按**此是下後變證。但頭汗出者。心火上炎也。

綱仲景曰。陽明病發熱汗出。此爲熱越。不能發黃也。但頭汗出者。身無汗。齊頸而還。腹滿。小便利。渴飲水漿。此爲瘕熱在裏。身必發黃。**茵陳蒿湯**主之。**同許叔微**曰。亦可用五苓散。**劉完素**曰。頭者諸陽之會。邪搏諸陽。津液上湊。則汗見於頭。邪熱內蓄。蒸發腠理。遍身汗者。爲熱越。身無汗。則熱不得越。熱蒸

於陽。故但頭汗出也。何者。以三陰經皆上至胸頸而還。不循於頭。獨諸陽脈上循於頭耳。故爲熱不得越而上達者也。王好古曰。頭汗出。齊頸而還。血證也。額上偏多者。屬心部。爲血證也。獨益中州脾土。以血藥治之。其法無以加矣。王肯堂曰。頭乃諸陽之會。熱蒸於陽。故但頭汗出也。三陰無頭汗。其經不上頭故也。偏身有汗。爲熱越。但頭汗出。熱上達也。如癰熱在裏。身必發黃。及熱入血室。與其虛煩。或陽明被火。及水結胸數者。皆但頭汗出。俱是熱不得越。故或吐或下。以除其熱也。且邪但在表。則無頭汗之證。必也寒濕相搏。與邪在半表裏。乃有頭汗也。如傷寒五六日。已發汗而復下之。胸脇滿。微結。小便不利。渴而不嘔。但頭汗出。往來寒熱。心煩。及傷寒五六日。頭汗微惡寒。手足冷。心下滿。口不欲食。大便鞭。脈細者。此皆邪在表裏兩間。令頭汗出也。濕家但頭汗出。欲得被覆向火者。寒濕相搏。故頭汗也。此皆不得謂之逆。然小便不利而成關格。若頭汗者。陽脫也。經云。關格不通。不得尿。頭無汗者。生。有汗者死。又濕家下後。頭額汗出而微喘者。亦陽脫也。經曰。濕家下之。額上汗出。小便不利者。死。下利不止者。亦死。二者乃頭汗之逆。陶華曰。諸陽經絡循於頭。頭汗者。邪搏諸陽也。裏虛則不可下。內瀉則不宜汗。頭汗證。不可再汗也。譚語。頭汗。是爲血熱。屬陽明。用承氣湯。心中懊惱。而頭汗。施豉湯。

額汗

綱仲景曰陽明病被火額上微汗出而小便不利者爲發黃。三陽合病腹滿身重難以轉側口不仁而面垢遺尿發汗則譫語下之則額上出汗手足冷若自汗出者白虎湯主之。目按此條之上曰三陽合病脈浮大上關上但欲睡眠合目則汗乃詳病脈病情及病機也本條乃言病狀及治方也必兩條合參而三陽合病之大要始得合目則衛氣行陰更兼汗出熱淫於內也

手足汗

綱仲景曰陽明病若中寒不能食小便利手足濇然汗出此欲作瘡瘕必大便初鞭後溏所以然者以胃中冷水穀不別故也。三陽併病太陽證罷但發潮熱手足漿漿汗出大便難而譫語下之則愈大承氣湯。王肯堂曰胃主四肢爲津液之主故病則手足汗出也手足汗出爲熱聚於胃是津液之旁達也。二者俱手足汗出一則大便初鞭後溏胃中冷不別水穀故不可下一則大便難譫語陽明證具故宜下。陶華曰四肢者諸陽之本熱聚於胃則津液旁達於手足也蘊熱則煩躁譫語挾寒則水穀不分此則承氣理中之不同處也。柯琴曰但手足汗出則津液之洩於外者尙少小便不利則津液不洩於下陽明所慮者亡津液此更慮其不能化液也。陽明以胃實爲病根更當以胃寒爲深慮蓄血

綱仲景曰陽明病其人喜忘者必有蓄血所以然者其人本有久瘀血故令喜忘尿雖鞭大便反易其色必黑宜抵當湯下之。王好古曰初便褐者重再便深褐色者愈重三便黑色者尤重色變者以其火燥也如羊血在日中須臾變褐色久則漸變黑色卽此意也當詳察之一。按此實陽明未病前證前此不知今因尿鞭爲陽明病鞭則當難而反易病機之變其原尙由太陽病陽明未病時先有宿血血主濡故不鞭而反易且火極反見水化故血久則黑也。

綱仲景曰病人無表裏證發熱七八日不大便雖脈浮數者可下之假令已下脈數不解合熱則消穀善饑至六七日不大便者有瘀血也宜抵當湯若脈數不解而下利不止必協熱而便膿血也。成無己曰蓄血者血在下焦蓄聚而不散也血菀於上而吐血者謂之薄厥血留於下而瘀積者謂之蓄血此由太陽隨經瘀熱在裏血爲熱所搏結而不行蓄於下焦之故也大抵看傷寒必先觀兩目次看口舌然後自心下至少腹以手按之覺有滿鞭者則當審而治之如少腹覺有滿鞭便當問其小便若小便不利者則是津液留結可利小便若小便自利則是蓄血之證可下瘀血經曰傷寒有熱少腹滿應小便利不利今反利者爲有血也又曰太陽病身黃脈沉結少腹鞭小便不利者爲無血也小便自利其人如狂者血證諦也皆須抵當丸下之愈陽明證喜忘尿雖鞭大便反易其色必黑亦是蓄血之證血蓄

於下。所以如狂者。經所謂熱結膀胱。其人如狂者是也。血瘀於下。所以喜忘者。內經曰。血並於下。亂而喜忘者是也。二者若有其一。則爲蓄血證明矣。蓄血證。又有輕重焉。如狂也。喜忘也。皆蓄血之甚。須抵當湯丸下之者也。如外已解。小腹急結。則爲蓄血之輕者。桃仁承氣利之。醫之妙者。何也。在乎識形證。明脈息。曉虛實。知傳變。其於形證之明者。衆人所共識。又何以見其妙。必也形證之參差。衆人所未識。而獨識之。且如病人無表裏證。發熱七八日。脈雖浮數者。可下之。假令已下。脈數不解。合熱則消穀。善饑。至六七日不大便者。此有瘀血。抵當湯當不大便。六七日之際。又無如狂喜忘之證。亦無少腹硬滿之候。當是時。與承氣者多矣。獨能處以抵當湯。是爲醫之妙者也。何以知其有蓄血也。脈浮而數。浮則傷氣。數則傷血。熱客於氣。則脈浮。熱客於血。則脈數。因下之後。浮數俱去。則已。若下之後。數去但浮者。則榮血間熱去。而衛氣間熱在。爲邪氣獨留心中。則饑邪熱不殺穀。潮熱發渴也。及下之後。浮脈去而數不解者。則衛氣間熱去。而榮血間熱在。熱氣合併。迫血下行。胃虛協熱。消穀善饑。血至下焦。若下不止。則熱得以去洩。必便膿血也。若不大便六七日。則血不得出洩。必蓄在下焦爲瘀血。是用抵當湯下之。此實疾病之奇異。醫法之元微。能審此者。真妙醫也。張元素曰。或問攻下之法。須外無表證。裏有下證。然後可攻。上言無表裏證。況脈更浮數。何故可下。曰。此非風寒之病。是內傷致然也。若外不惡寒。

裏無譴語。但七八日發熱。有燥津液。乃陽盛陰虛之時。苟不攻之。其熱不已。而變生焉。故云雖脈浮數可下。不待沉實而後攻也。夫內傷者何。經曰。跌陽脈浮而數。浮則傷胃。數則傷脾。此非本病。醫特下之所爲也。仲景之意。不外是理。凡傷寒當下之證。皆從太陽陽明在經之邪而入於府。故下之。今不言陽明病。但云病人無表裏證。此非自表之裏而病也。但爲可下。故編於陽明篇中。按前用抵當湯雖表證仍在而不顧者。急於救裏也。用桃仁承氣。雖外證已解而邪甚者。仍當顧表也。此表裏證俱無而仍用抵當者。以表裏熱極也。合熱是表熱極。協熱是裏熱極。無表證是不頭痛惡寒。無裏證是不煩躁口渴。前條大便反易。知血之瘀於中者已久。是驗之於已形也。此條仍不大便。知血之在內者已結。是料之於未形也。六經惟太陽陽明二經多血。故俱有蓄血證。

綱仲景曰。病人胸滿痞塞。舌青口燥。但漱水不欲下咽。無寒熱。脈微大來遲。腹不滿。其人言我滿。爲有瘀血。病者如熱狀。煩滿。口乾燥而渴。其脈反無熱。此爲陰伏。是瘀血也。當下之。**目**王好古曰。血證。古人用藥。雖有輕重之殊。而無上下之別。今分作上中下三等。以衄嘔唾吐血爲上部。血結胸中爲中部。蓄血下焦爲下部。夫既有三部之分。故藥亦當隨其輕重也。汗多爲衄血。脈浮灸之咽燥爲唾血。當汗不汗。熱入於裏者。爲嘔血吐血。此在上也。犀角地黃湯。涼膈散。加生地亦可。然衄嘔唾吐俱在上。亦當

以輕重分之大凡血證皆不飲水惟氣證則飲之宜詳審此證乃足太陰所主脾所不裹越而上行所以有吐嘔之候實者犀角地黃湯虛者黃芩芍藥湯凡病嘔吐者以脾所主故俱用芍藥主之是知太陰藥也血結胸中頭痛身疼漱水不咽者衄也無熱胸滿漱水不咽喜忘昏迷其人如狂心下手不可近者血在中也桃仁承氣蓄血下焦其人發狂小腹滿鞭小便自利大便反黑及臍下疼者抵當湯丸如狂者在中發狂者在下吳綬曰凡蓄血者瘀血留結於內蓋傷寒病在太陽當汗不汗則瘀熱在裏必血結也大抵看傷寒病人心下兩脇少腹但有鞭滿處以手按則痛者便當問小便如何若小便不利乃水與氣也若小便自利爲有血也王肯堂曰病人七八日後兩手脈沉細微膚冷臍下滿或狂或躁大便實而色黑小便自利者此蓄血證也若老幼氣虛弱者宜生地黃湯

發狂
附如狂

綱仲景曰陽明病初欲食小便反不利大便自調其人骨節疼翕然如有熱狀奄然發狂漑然汗出而解者此水不勝穀氣與汗共併脈緊則愈張介賓曰傷寒發狂本陽明實熱之病然復有如狂證者雖似狂而實非狂此中虛實相反最宜詳辨不可忽也凡實熱之狂本屬陽明蓋陽明爲多氣多血之經陽邪傳入胃府熱結不解因而發狂內經脈解篇曰胃者土也故聞木音而驚者土惡木也其惡火者

熱甚也。惡人者。以陽明厥則喘。喘則惡人也。其病甚。則棄衣登高。踰垣上屋。或數日不食。以四肢爲諸陽之本。陽盛則實。實則能登高也。棄衣而走。熱甚於身也。妄言罵詈。不避親疎而歌者。陽盛爲邪也。又曰。陰不勝陽。則脈流薄疾。并乃狂。又曰。邪入於陽。則狂是皆以陽明熱邪上乘心肺。故令心志昏亂。若此。此陽狂也。然傷寒病至發狂。是爲邪熱已極。使非峻逐火邪。則不能已。故但察其大便鞭結。或腹滿而堅。有可攻之證。則宜以大小承氣。或涼膈散。六一順氣湯之類下之可也。如無脹滿實堅等證。而惟胃火致然者。則但以白虎湯抽薪飲輩洩其火。邪自愈。按此爲水濕之病。其人胃本不虛。只因水氣怫鬱。鬱極而發。奄者。忽也。言忽然而狂也。

綱仲景曰。太陽病六七日。表證仍在。而反下之。脈微而沉。反不結胸。其人如狂者。以熱在下焦。少腹當鞭滿。小便自利者。下血乃愈。所以然者。以太陽隨經瘀熱在裏故也。抵當湯主之。太陽病身黃。脈沉結。少腹鞭。小便不利者。爲無血也。小便自利。其人如狂者。血結證也。抵當湯主之。太陽病不解。熱結膀胱。其人如狂。忽自下。下者愈。其人不解者。尙未可攻。當先解外。外解已。但少腹急結者。乃可攻之。宜桃仁承氣湯。陽明病。其人喜忘者。必有蓄血。所以然者。本有久瘀血。故令喜忘。屎雖鞭。大便反易。其色必黑。宜抵當湯下之。綱朱肱曰。發狂有二證。陽毒發狂。蓄血如狂。其外證與脈皆不同。病人煩躁。狂走妄言。面赤